

# **Pole sǎbéy ní-ò tékínm̀ǹǹl̀e**

## **Korēnti tǎn tyí**

### **Tyàh-̀nsah wəyɛ**

#### *Wəy kǝ́nó́l̀e*

<sup>1</sup> Ǹm̀o Pole nê-á Yesu Krista tǝntò névile à yĩnɛ Liyel dyo yĩ tǝnɛ, ǹm̀o ànê á yĩnpɪ Timote ye n tɛkɪ n m̀o sǎbéyɛ Yesu yǝ sǝpú tĩnkɪ tyí Korēntɪ kwil sɔkɔ, ànê Yesu yǝ sǝpú pól tyí nónó-á mɛ Akayi mara pól sɔkɔ. <sup>2</sup> Á kélɛ n yah n kǝ Sú Liyel ànê Tǝ ñgbɛ Yesu Krista tyí nɛ, pè yǝb̀nɔrɪ ànê yèvinɪnɛ yé kǝ.

#### *Pèpɔrɪ pĩnó wəy kǝ́nó́l̀e*

<sup>3</sup> Mé n wɛkɪ Liyel tyí, ǹm̀o nê-á ápi Tǝ ñgbɛ Yesu Krista Súle. Ǹm̀o ye Súle nê-á névyɛ yǎmɛ n yah. Névyɛ nno dé-ò Liyel ye ñnɛ. <sup>4</sup> Ǹm̀o ye ápi nno dé-òlɛ á yèkwɔrɪ tyinɔ pól sɔkɔ, sǝnko nónó pól-á mɛ yèkwɔrɪ sɔkɔ, ápi tɔ fɛ pé nno de sǝ-á à ápi nno de. <sup>5</sup> Áyáh mɛ yèvyǎhrɪlɛ n gbah n wɛ n yuku sǝ Krista tyí kǝlɛ, sɛ ye Krista tɔ mó mɛ á nnoɛ n gbah n de n yuku sɛ. <sup>6</sup> Áyáh yèvyǎhrɪlɛ n pɪ, yépi nno de yĩn ye ànê yé pwáhnɔnɔ yĩnnɛ. Á nno-à de, sǝré m̀o yĩn ye yé sɔkɔ sǝnko yépi tɔ fɛ yèvyǎhrɪlɛ n sro ápi-á nónó dùkù sro sɔkɔ. <sup>7</sup> Ápi yáh-̀nsah náh mɛ tyénó́l̀e à yuku yépi tyí tĩnnɛ. Á pĩ nɛ sǝ-á yé yèvyǎhrɪlɛ n pɪ ále wɛ tyí, sɛ-á yé nno tɔ kɪ n de n pɪ ále wɛ tyí.

<sup>8</sup> Á yũnpyé, áyáh yèvyãhrı nê wε Asi mara soko, á náh me ké tyí ne yépi tẽ ké yítũri soko. Kéne yèvyãhrı mề kãn pı ápile à pɔ kah mɔ á yáh-ńsah kɔ kè tyε, fók á sô me n sô ne kãh kı á yô yĩ.

<sup>9</sup> Á sěnyĩno sô me ké yô ne tir yó náh á kúnó dukù ku n pi. Képah ye á me á sônɔ tokɔ to á gblɔy yô, té kè sah Liyel yô ñmɔ nê-á lékyĩle n yilki n mɔ. <sup>10</sup> Ñmɔ ye ápi pwah mɔ kũ mề dukù gbô. À kı tɔ á pwah n mɔ n pi. Á gbô sàhnó me ñ yô ne, wãh kı á pwah n mɔ n pi ntɔ. <sup>11</sup> Sónmonɔ ye yépi tɔ me n so mɔ á tyí yáh nírĩle n pı á tyí. Kãh pı sě, á kı pèpɔrı wε Liyel tyí nékwĩnkí nírí pínó gbô yô. Té névyε náhnáh tɔ kı wε wekı ñ tyí ápi yĩnne.

### *Pole vìnmonɔ dah mɔ ñ kóló tyí soko*

<sup>12</sup> Ápi nìvìnì yô-á nêne, kè wε yò: Á kè pĩ á sônɔ soko ne áyáh me á fɔkɔ dal no pólle yãryãr pí-ńkẽne, ñte áyáh me sěntěne n pı n kal yépi wɔ tyí. Liyel yòhnñnmonɔ gbô yô ye á kɔ á tẽ wε képah pı, névi lékãm gbô yô náh. <sup>13</sup> Ápi tɔ náh kwãh yó wãrkı tekı mɔ yé tyí nê-á yé kar té ké kór pĩ kwɔ. Ñ sěnyĩno me ké yô ne, yáh kı fě ñyɔ tɔ kar kı ké kór pĩ yĩ. <sup>14</sup> Yé me tyi nópi dukùle n pne kwéy. Tẽ ñgbě Yesu syı n pɔ sôle, yé yô kı yô ápi yĩnne, ápi tɔ yô kı mó yô yépi yĩnne. <sup>15</sup> Ñ sěnyĩno sô me képah yô, képah ye mé ne mé pɔ yépi ñgbò tĩnne kè kɔ kè pı yòbènɔrı ke ní-òle yé tyí. <sup>16</sup> Ñmɔ sô me ké tyí ne mäh kı n soko Masedonı mara soko, mé n pɔ n wil n soko yé

tyí. Té máh kɪ n sɪ, mé n pɔ n wil yé tyí ntɔ́ yé kɔ́ yé n yohnɪ n mɔ́ mé wɛ n yɔ́ n sɔkɔ́ n kólólɛ Nsyude mara sɔkɔ́. <sup>17</sup> Ntɛ kãh pɔ pɪ mé nãh tɛ wɛ pɔ yé tĩnnɛ, kɛpah se n wɛkɪ nɛ máh mɛ tyilɛ n yah n tɔkɔ́ n dah n mɔ́ sɛ? Kɛpah nãh pɪ, máh mɛ tyilɛ n yah n tɔkɔ́ n yah yĩnnɛ; mãh nɛ àwɛ-á, dô mè n tɔ́ nɛ ðɔ́-á? <sup>18</sup> Liyel ye n tãrfyòlɛ nɛ áyáh wɛy nɛ yo yé tyí, kɔ́nvínwɛkɪnɔ́ nãh kélɛ. <sup>19</sup> Nmɔ́, ànê Silasɪ, ànê Timote-á Liyel Pídí Yesu Krista wɛy nɛnɛ n yo yé tyí, kɔ́nvínwɛkɪnɔ́ wɛy nãh kélɛ dé, gbɪ kókó ye kélɛ. <sup>20</sup> Yé nãh wɛ dí, ñmɔ́ gbɔ́ yɔ́ ye Liyel vyãh kɔ́nɔ́ tyi pól yĩnɛ n tɛ. Nmɔ́ gbɔ́ yɔ́ ye tɔ́ ápi amiinalɛ n yo à gbílkinólɛ n sah Liyel yɔ́. <sup>21</sup> Liyel ye kɔ́ ápi ànê yépile tãhkílɛ á wró kwrónmɔ́nɔ́ gbɔ́ yɔ́ Kristalɛ. Nmɔ́ ye wilki sah ále n tyí yɔ́. <sup>22</sup> Á á pɔkɔ́ mɔ́ à á pɪ n tyílɛ. Té n Mirki dah mɔ́ á sɔkɔ́ nɛ gbɔ́ yɔ́-á á pĩ nɛ, wãh n vyãhlɛ á kɔ́ yĩ nónó tyí sɔkɔ́, áyáh kɪ sɛ wɛ n pi. <sup>23</sup> Liyel ye n tãrfyòlɛ, máh kɪ mɛ mìnì yo mè n ku. Yé yɔ́ wilki yĩn ye tir sɔkɔ́ n kɔ́ mé nãh n sɪ pɔ Korēnti kwil sɔkɔ́. <sup>24</sup> Á nãh mɛ n yah n kɔ́ nɛ á tir yó kãhlɪ n sah yé yɔ́ à yuku yé Liyel yɔ́ sɛnɔ́ tyí tĩnnɛ dé. Yòhnìn mɔ́nɔ́ ye á n yohnɪ n mɔ́ yélɛ sɔ́nko nìvìnì wɛ yé sɔkɔ́, yáh sɔ́npílɛ mɛ yé tah sah Liyel yɔ́ sɛnɔ́ sɔkɔ́.

## 2

<sup>1</sup> Nmɔ́ kè yah n gblɔ́y nɛ yɔ́ nãh mɛ ké tyí mé n sɪ n pɔ yé tĩnnɛ mé pɔ yèkwɔ́rɪ yɔ́rɪ mɔ́ yé yɔ́ ntɔ́. <sup>2</sup> Nmɔ́-à kɪ yèkwɔ́rɪ mɔ́ yépi sɔkɔ́, nɛ kɪ pɪ ñmɔ́ nìvìnì yòlɛ, né yépi nãh máh yèkwɔ́rɪ mɔ́ yépi nónó sɔkɔ́? <sup>3</sup> Mé sɛbéy mè wãrkɪ tɛkɪ mɔ́

yé tyí, sǒnko mé káh pɔ yé tĩnne yé tókù kǒ pè yèkwɔrɪ mɔ ní sɔkɔ, pépi nónó-á sǒ yĩne nìvìnì mónóle ní sɔkɔ. Mé kè pĩ yĩ ne, mǎh me nìvìnì sɔkɔ, kè n pɪ nìvìnìne yépi tɔ tyí. <sup>4</sup> Nmɔ-á sébéy mène n wǎrkɪ gbí nêne, ní nɪ sǒ me yíkínóle, ní lékǎm sǒ me vye fěkɪ té yétĩ me n kah n kwɛ. Yèkwɔrɪ nǎh sǒ mé n yah n kǒ mó-ńsahle yé sɔkɔ dé, mé sǒ me ké tyí ne yé pĩ, yé tyí-á me nɔ ní tyí à kyɪ syɪ nýǎh tyí.

<sup>5</sup> Yèkwɔrɪ-à we ònì yó gbô yô, ñmɔ tyí nǎh tẽ pɪ dé, yé pól yô ye tẽ yɔrɪ mɔ kéle. Nte áyâh ne á káh kè yɔ n kah mɔ, á kɪ ne yé pól yô-á tẽ yɔrɪ mɔ kéle. <sup>6</sup> Kéne tẽ tẽne, tówû-á kɪ lékǎh nêne à kǒ, képah kɪ yĩne ñne. <sup>7</sup> Képah ye, yé yĩne yè yô mɔ tẽ kǒ yè mó ñ nɪ de, sǒnko yèkwɔrɪ káh pɔ ñ yáh-ńsah tyɛ n kah mɔ.

<sup>8</sup> Mé kéle n yah n kǒ yé tyí tole ne, yé kéle tẽ wěkɪ ne ñ tyí-á me nɔ yé tyí. <sup>9</sup> Mǎh sébéy mène n wǎrkɪ n tɛkɪ n mɔ yé tyí yô nê yô tole, mé sǒ me ké tyí ne mé yé gbɪ yah, yáh kɪ me n sah ní yóré yô tyi tyi pól sɔkɔ. <sup>10</sup> Yâh yô mɔ névi nê kǒ, ñmɔ tɔ kɪ yô mɔ tẽ kǒ. Té yâh we mé yô mɔ ònì kǒ, yépi yĩn ye mè n pɪ kéle Krista yah sɔkɔ. <sup>11</sup> Képah sɔkɔ, sètǎn yòtẽ nǎh syô-ńsah we à tẽ we n pɪ á tyí. Á pól ñ yah mó-ńsahle n pne dò.

### *Pole sǒnɔ fěkínóle Tite tyí sɔkɔ*

<sup>12</sup> Mǎh yĩni tẽ Turasɪ mara sɔkɔ Yesu Krista Nìvìnì tir yó-ńsah, mé kè we Liyel ké wěkɪ yɪkɪ mɔ ní kǒ palle. <sup>13</sup> Nte mé nǎh ní yũnpi Tite we nénpó sɔkɔ. Kǎh pɪ sě, ní sǒnɔ nǎh sǒ me tẽnóle

fĩ nùkú sòkò. Képah ye, mé me wěkì ni nénpó tãn tyí, té sòkò Masedonì mara sòkò.

*Těnwewo nê-á n we Yesu Krista gbô yô*

<sup>14</sup> Gbílkinó ne n sah Liyel yô, òmò nê-á á pì tẽnwepule á wró kwrónmòno gbô yô Kristale. À á kô á Krista dùkùle n yo n tó n mò n kô tãntãn pól sòkò, sô-á làsèkwèl pãn n tó n mò tyah pól sòkò. <sup>15</sup> Ápi pì làsèkwèl pãn pènèkì tyí kôle Liyel tyí, á wró kwrónmòno gbô Kristale. Névyè nónó-á pwáhnmòno wěkì yô, ànê nónó-á me tyí yíkinó wěkì yô, pãn mènè me n yĩni n tẽ pé pól tyí. <sup>16</sup> Túkù tyí, á me n pò kétukùyô nê-á n pò n pò kũnè. Túkù tyí mó, á me n pò palle nê-á n pò n pò minnè. Ntè nê tẽ wò kì fẽ képah pì wé? <sup>17</sup> Névyè náhnáh me Liyel wey tòkò gbòle n yĩ. Ápi tẽ wò náh me pépi tyí kôle. Liyel ye tó ápile, képah ye á me á fòkò dal mò n weynè n yo n yah sòkò, á wró kwrónmòno gbô yô Kristale.

### 3

<sup>1</sup> Ápi se tó yĩnè á gblõy dùkù yónóle yé tyí? Képah náh pì, á se yĩnè à sébéy yó wãrkì yé kô à á gblõy dùkù yo yé syah, sô-á túkù kéle n pì? Tĩ, yépi se kì wãrkì á kô sébéynè, nê sòkò-á yé kì me ápi dùkù yo? <sup>2</sup> Yépi ye ápi sébéy mènè. Kè me wãrkínóle á nno sòkò. No pól kéle n pnè, té kéle n kar n pnè. <sup>3</sup> Kè me píkínóle ne yépi-á sébéy mènè, nê sòkò welo-á Krista á kô á wãrkì. Wãrkínó mènè, min nétẽ Liyel Mirki gbô nìy ye, wãrkì wãrkì kwâh nìy náh. Dyèh fábko fábko

yō soko nǎh kéle wǎrkínóle dé, névye nno soko ye.

<sup>4</sup> Krista gbō yō ye á sěnyĩno me kéne welo yō Liyel yah soko. <sup>5</sup> Ápi-á tyi nónóne n pɪ yò, á yěngbě tēnweno nǎh á fě n pɪ séle dé, Liyel kónó ye. <sup>6</sup> Nmo ye á kō tēnweno le á fě yégbékè kwrónmōno kėsǎn tyile névyele n kwō. Kéne yégbékè kwrónmōno nǎh n wil tyi kōnsàhnó wǎrkínsàhnó soko dé, Liyel Mirki tō vyāh ye kéle. Yé nǎh we di, tyi kōnsàhnó nê-á wǎrkínsàhnóle, képah n pɔ n pɔ tyí yíkínóle. Nte Liyel Mirki wɔ minne n kō. <sup>7</sup> Tyi kōnsàhnó wɔ nê-á n pɔ n pɔ tyí yíkínóle, ké wǎrkínmōno gbīne dyēh fábko fábkonó yō, Liyel tǒrí sō me tiki pɔ Moyisi yèpɔ kō kè n tē, fókó Yisrayel no nǎh sō me fě n yah n dah n mɔ n yah soko. Té kéne tǒrí nǎh mo pólle. <sup>8</sup> Nte Liyel Mirki tē wɔ-á tō nēne n pɪ, képah nǎh Liyel tǒrí wěkɪ n kal n pɪ di? <sup>9</sup> Tyi kōnsàhnó wǎl kónó nê-á n pɔ n pɔ tyí yíkínóle, gbílkínó-à we képah tyí soko, gbɪ wěkɪ kónó wɔ se pyě. <sup>10</sup> Á kɪ fě yo ntēne ne tǒrí nê-á sō me gben tēne, núkúnúkú tyí-á képah toko yō. <sup>11</sup> Gbílkínó-à me sah mó-ńkē kwāh yō, mo mo tyí wɔ se pyě.

<sup>12</sup> Á gbō sàhnyĩno me képah yō, képah ye á nɪ me yĩnnóle. <sup>13</sup> Ápi nǎh me pɪ Moyisi tyí kōle, nê-á sō fwo vike tū n yah soko sōnko Yisrayel no káh n yèpɔ tēnó yal n mɔ gbɪ pɪ, képah nê-á sō mo mo tyí nǎh kéle. <sup>14</sup> Nte pè me sě fěntū soko. À pɔ nɔ kwey tyí, pàh tyi kōnsàhnó kedyāhle n kar, kéne fwo mè n ne n me fókóntūtēnóle pé yah soko. Kè nǎh toko to pé yah. Né nê nǎh n wró kwɔ

mɔ Kristalɛ, kɛ nãh n tokɔ n to tɛ yah. <sup>15</sup> Gbɪ yɔ à pɔ syɪ kwey tyí, pàh Moyisi tyi kònsàhnóɛ n kar, fwɔ mɛ n nɛ n mɛ pé lékãm yah fɔkɔ n tũ n sah. <sup>16</sup> Ntɛ nê wɔ-à sɛ Tɛ ñgbɛ yɔ, fwɔ mɛ n tokɔ n to tɛ yah sɔkɔ. <sup>17</sup> Tɛ ñgbɛ nê tyí-á n yo ásô, Liyel Mirki ye. Ntɛ Liyel Mirki-à mɛ nyãh sɔkɔ, névyɛ n nɛ mɛ pé gblɔy yɔ nɛnpó. <sup>18</sup> Fwɔ nãh mɛ víkɛntũnɔɛ ápi tɛ wɔ yah. Á òkù mɛ Tɛ ñgbɛ tɔríɛ n wɛkɪ. Á vi mɔ pɪ Tɛ ñgbɛ tyí kɔɛ. Wãn mɛ n mɔ n yuku á tɔrí yɔ. Tɛ ñgbɛ tɔ vyãh ye kɛpahɛ, ñmɔ nê-á Mirkilɛ.

## 4

### *Pole ànê pé no-á fòhnó nónó wɛ*

<sup>1</sup> Liyel ye ápi yãm yah té tɔ mɛ dahbɪ á gbɔ, kɛpah ye á kɛɛ n pɪ wɪlkúni kɛɛ. <sup>2</sup> Sen tyi nónó-á névyɛ n nɛ n wɔbɪ n pɪ, ápi sépi wɛ yɛ. Á mɛ á tyilɛ n pɪ yɪnvɪ kɛɛ, á nãh mɛ Liyel wɛy kórɛ n vi n mɔ pólɛ. Gbɪ ye ápi mɛ n yo tótó, sɔnko névyɛ pól sɛ á yɔ Liyel yah sɔkɔ. <sup>3</sup> Ntɛ ápi-á Nìvìnì tir nêɛ n yo, kɛpah-à kɪ tɔ mé-ńkɛɛ kyòò, tyí yíkípú tyí ye kɛ nãh mɛ kyòò. <sup>4</sup> Sétàn yòtɛ nê-á kèkòyɔ mɛ tɔɛ, ñmɔ ye fɛntũ mɔ pé yah. Á kàh-ñsah tũ pé tyí, sɔnko Nìvìnì tir-á Krista tɔrí kyòò nêɛ n wɛkɪ, pɛ káh fɛ kɛpah wɛ. Té Liyel kètò ye mó tɔ Kristalɛ. <sup>5</sup> Ápi gblɔy tyí nãh á n yo n kɔ dé, Yesu Krista tyí ye á n yo n kɔ nɛ ñmɔ-á Tɛ ñgbɛɛ. Ápi tɛ wɔ pɪ tɔnpɪɪɛ yé tyí Yesu Krista yɪnnɛ. <sup>6</sup> Yé nãh wɛ di, Liyel nê-á yo nɛ ńkɛ kyòò mɔ fɛntũ sɔkɔ, ñmɔ ye kɔ mɔ kyòòɛ ápi nno sɔkɔ, sɔnko névyɛ n tɔrí wɛ

nê-á me n tẽ Krista yèpɔ sɔkɔ. <sup>7</sup> Kéne tahrɔ mè ye ápi kɔ, ápi nónó-á sohki kěne á sɔkɔ puri pĩn tyí kɔle, sɔnko névyé pĩ ne nkẽ tẽnwenɔ ngbẽ mè náh wil ápi tyí, kãh wil Liyel tyí. <sup>8</sup> Fõhnó me n sah ápi yõ yey yey pólle, nte á náh me tẽ kwɔ. Á lékãm me vye fẽki, nte á yáh-ńsah náh tyɛ. <sup>9</sup> Pè me kɔ á náh à ále n fõh, nte Liyel náh n náh vi á kɔ. Pè á mɔ min, nte á náh ku. <sup>10</sup> Yesu-á fõhnó we à ku dùkù nêne, képah ye me ápile n we sɔmesɔ. Képah ye kɔ névyé kɔ pè kɔ pĩ ne áyáh me á min sɔkɔ nɔmɔ gbõ yõ. <sup>11</sup> Né ápi náh ku, gbĩmegbĩ á kɔ me kũne n do n yah Yesu yĩnne. Á wil gběnsê nê-á mó sohki kěne, kè kɔ min we nɔmɔ gbõ yõ. <sup>12</sup> Kãh pɔ sɛ, ápi me wẽ sɔkɔ kũne, yépi mó me tyé-ńkẽ minne n we. <sup>13</sup> Kè me wãrkínsàhnóle Liyel wey sébéy sɔkɔ ne nkẽ: «Mé sɛ Liyel yõ, képah ye ń kɔ mé n weyne n yo.» Sɛ ye ápi tɔ sɛ n yõ, képah ye á kɔ á n weyne n yo. <sup>14</sup> Yé náh we di, á pĩ ne Liyel nê-á yilki mɔ Tẽ ngbẽ Yesu lékóle, wãh kɔ ápi tɔ lékyĩ yilki mɔ, té kɔ kyɔ ápi ànê yépi sah n tnô. <sup>15</sup> Yépi yĩn ye tyi nópi pól ápile n we. Té képah sɔkɔ ye mó Liyel kɔ yòbènrɔ náhnáh pɔ névyé tyí, sɔnko pè ne n wekɔ n tyí, pè mó nne n gbilki.

*Káh n ye á wil ku, nɔli dò me n syiki tẽ*

<sup>16</sup> Képah ye kè náh me wílkúnine ápi tyí pólle. Á wil gběnsê tyí-à kɔ sɔ me n yiki n yuku, á min tẽ wɔ me n gbah n pɔ n yuku sãnne sɔmesɔ. <sup>17</sup> Yé náh we di, mó-ńkẽ yèvyãhrɔ kwéy nê-á ápi yõ núkúnúkú yò, képah náh me sãh yah yah tẽne

tyé-ńkē yō yōnó nê-á á kɪ pɔ n wɛ n pi képah tyí sōwāh. <sup>18</sup> Yí-á yí nónónɛ n wɛ n pɛ, sépi náh ápi mɛ n yah n kō. Kè náh yí nónónɛ n wɛ n pɛ, sépi ye á mɛ n yah n kō. Yí-á n tẽ n pɛ yí nónó yō, sépi náh n mo. Ntɛ kè náh n tẽ n pɛ nónó yō, sépi n nɛ n mɛ tyétyéní kēɛ.

## 5

<sup>1</sup> Wil gběnsê nê-á ápi min tẽ-ńsahle sétáh mè yō sɔkɔ yò, ké tyí-à pɔ yɪkɪ, Liyel kɪ min tẽ-ńsah yó yah á kō yĩnyō, nê-á kɪ mɛ kũmm yō sɔkɔ. Kéɛ tẽ-ńsah mènɛ, névi gběnpɪnɪ náh kéɛ. <sup>2</sup> Ntɛ núkúnúkú, ké sɔkɔ de dékè mɛ á kah tẽ, képah ye á mɛ n gbí ké yĩnnɛ. <sup>3</sup> Áyáh kɪ wɛ de ké sɔkɔ, á wil títí náh tō n wɛ n pi. <sup>4</sup> Wô nê pól-á á min kɪ n pɪ n pi sétáh mè yō sɔkɔ, á kɪ mɛ gbĩnó sɔkɔ tókópékè sɔ á yō. Min tẽ-ńsah nê-á á tyí sétáh mè yō, kè náh mɛ á kɪ nɛ á sɔ mɛ ké tyí yíkí-ńsahle n yah n kō dé. Yíkí-ńkē min tẽ-ńsah nê-á Liyel kɪ á kō n pi yĩnyō, á mɛ ké tyí nɛ képah pɔ yɪkɪ yɪkɪ tyí mè swɔ tɔkɔ. <sup>5</sup> Liyel ye sépi pól yah sah ápi yĩnnɛ. Pèpɔɪ nónó-á à kɪ n pɪ n pi á tyí, n Mirki ñgbò ye à tɛkɪ mɔ á kō sé sɔkɔ. <sup>6</sup> Képah ye, á sěnyĩnɔ mɛ ké yō gbĩmɛgbí nɛ á min tẽ-à kɪ fyò tẽ á wil gběnsê mè tẽ sɔkɔ, á wró-á mɛ dónóle Tẽ ñgběɛ. <sup>7</sup> N yō sěnó gbō yō ye á mɛ n yuku yahle, n wénó gbō yō náh. <sup>8</sup> Á sěnyĩnɔ mɛ ké yō, képah ye á mɛ ké tyí nɛ á min yal wil gběnsê mè sɔkɔ, kè kyɪ n tẽ Tẽ ñgbě tñ. <sup>9</sup> Ntɛ kàh kɪ se wɛ wil ò; kàh kɪ se wɛ wil-ńkē ò; áyáh pɪ sɔ té á tyí n nɔ n pi Tẽ ñgbě tyí, képah ye á mɛ n yah n kō. <sup>10</sup> Yé náh wɛ di, á pól yĩnɛ Krista á tuke. Képah

sokɔ, nê-à kɪ mɛ pɛpɛy pɪ kɛkɔyɔ mɛ sokɔ, à kɪ à dyah kɛlɛ. Nê-à kɪ mó mɛ pɛkɛ pɪ, à kɪ à dyah kɛlɛ.

*Ápi wró kwrɔ mɔ Liyelle Krista gbô yô*

<sup>11</sup> Kwâh nê-á Tě ngbě yah tíkí pínóle, ápi kɛlɛ n pɛ. Kɛpah ye, á mɛ n yah n kɔ nɛ á névyɛ sɔnɔ vi mɔ pɛ n yah tíkíle n pɪ. Ápi fí yó ntě náh mɛ Liyel pu. Té n̄mɔ sɔnɔ sokɔ, yépi tɔ api pĩ yĩ. <sup>12</sup> Á gblɔy dukù náh tɔ á n yo yéle n syah, n̄te syɔ-nsah ye á yéle n kɔ yè fě yé gblɔyne n gbilki ápi yĩnne. Kɛpah sokɔ, wényo-nsah kɪ wɛ yé tyí yí yah pípú tyí. <sup>13</sup> Ápi yôgbɛl-à kɪ sɔ mɛ yuku, Liyel yĩn ye. N̄te á yah-à kɪ se mó mɛ gbréy, yépi yĩn ye. <sup>14</sup> Krista tyínɔnɔ ye yah syi ápi tyí, ápi nónó-á pĩ nɛ nénúkú-á ku no pól swɔ sokɔ. Kǎh pɪ sɛ, kɛ mɛ á kɪ nɛ no pól tɔ sɔ ku. <sup>15</sup> À ku no pól yĩnne sɔnko nónó-á mɛ min sokɔ, pɛ káh pé minne n pɪ pé gblɔy yĩnne, nê-á ku té n lókó yilki mɔ, pɛ kɛlɛ n pɪ n̄mɔ yĩnne. <sup>16</sup> Kǎh pɪ sɛ, núkúnúkú tɛne á náh tɔ n̄n̄i yó ntě yah n pɪ à yĩne névi yòtàhsyi yáhnóle. Áyâh sɔ sɔ mɛ Kristale n yah sɛ, núkúnúkú á náh tɔ mɛ n̄ne n yah sɛ. <sup>17</sup> Névi nê wró-à mɛ kwrónmɔnɔle Kristale, tɛ nɪ n vi n mɔ. Á n pɪ dukù kedyâh fín n mɔ, n té pɪ dukù késán tokɔ. <sup>18</sup> Liyel tɔ vyâh ye sépi pólle, n̄mɔ nê-á ápi wró kwrɔ mɔ n̄ne Krista gbô yô, té mɛ wró kwrónmɔnɔ tɔ dahbɪ ápi gbô. <sup>19</sup> Yé náh wɛ di, Liyel náh kɛkɔyɔ névyɛ tyípɛl mɔ kɔ, à syɔ Krista tyí à pé wró kwrɔ mɔ n̄ne, té mɛ wró kwrónmɔnɔ tyí yónó dahbɪ ápi gbô nɛ, á névyɛ wróle n kwrɔ n mɔ péwɔle. <sup>20</sup> Krista yĩn yô ye

ápi me n wɛkɪ. Kè me á kɪ nɛ Liyel sɔ̃ n yo n mo névyɛ tyí ápi gbõ yõ. Képah ye á kéle n yah n kɔ̃ yé tyí Krista yĩn yõ nɛ, yé yé wró kwɔ̃ n mo Liyellɛ. <sup>21</sup> Krista nê-á à náh tyípékè pɪ yah, Liyel ñmo twah mo ápi tyípèlle, sɔ̃nko ñmo gbõ yõ, ápi to pɪ yályál Liyel yah sɔko.

## 6

<sup>1</sup> Ápi-á pɪ Liyel tɔ̃ pɪ m̀nɛ sɛ̃, képah ye á kéle n yah n kɔ̃ yé tyí nɛ wǎh yõbènɔ̃rɪ nê pɪ yé tyí, yé káh ye kè pɪ yõ kɛ̃nɛ. <sup>2</sup> Yé náh wɛ di, Liyel nɛ ñkɛ̃:

«Tyah-á sɔ̃ me palle gbĩ nễnɛ, mé á nírí tɛ̃.

Pwáhnmõnõ sɔ̃lɛ, mé ñ yohnɪ mõ.

Tyah pèpɛy gbĩ mè ye núkúnúkú yò.

Yah, pwáhnmõnõ yòh ye kwɛyɛnɛ.»\*

<sup>3</sup> Á náh me ké tyí nɛ á ñnĩ yó ñtɛ̃ yõ yɪkɪ, ñnĩ kɔ̃ à pɔ̃ wényo-ńsah wɛ á tɔ̃ tyí sɔko. <sup>4</sup> Ntɛ tyi tyi pól sɔko, ápi me á gblɔ̃yɛ n wɛkɪ Liyel tɔ̃npɪbɪ kègbɔ̃lɛ. Á me gbah tɛ̃ yèvyǎhrɪ, ànê yèkwɔ̃rɪ, ànê tíkí képékèlɛ n sro náhnáh. <sup>5</sup> Á ko syi, té wòkònpèkè pɪ. Pè névyɛ mõ á yõ, té á mõ tãn pèl pínó sɔko. Á náh me n wɛ n dɔ̃, yòke to náh me n wɛ n yõ. <sup>6</sup> Á me tɔ̃lɛ n pɪ Liyel tyí fɔkɔ̃lɛ píkínó̃lɛ ànê á lékám pólɛ. Á me tyilɛ n sro me pèporɪlɛ n pɪ Liyel Mirki gbõ yõ. Tyínɔ̃nõ yèsyɪkɪ me á sɔko, <sup>7</sup> ànê gbɪ wɛlɔ̃ ye á me n yo Liyel tǎhkɪ gbõ yõ. Gbɪ wɛkɪ kóló̃ ye ápi pɪ á méfwó yíle à á sépébíle n fwo, té á gblɔ̃y yòlɛ n syɪkɪ. <sup>8</sup> Névyɛ á dɔko n mõ, képah náh pɪ pɛ á kɔ̃ fɛ̃. Pɛ á yígbíle

\* **6:2** 6.2 Yah n tɛ Yesayi 49.8.

n yo, képah náh pɪ pě á yípollɛ n yo. Pě áɛ n pɪ mìnnyobeɛ, té gblɔ yópú ye mó tɔ́ áɛ. <sup>9</sup> Pě áɛ n pɪ pé kósyì á pĩ, té pè mó tɔ́ áɛ n pne kyó. Pě áɛ n pɪ lékyî sɔ́ áɛ té vye ye mó tɔ́ áɛ. Pě fõhnóɛ n sah á yõ, té pè náh áɛ n ko n mɔ. <sup>10</sup> Pě yèkwɔɾɪ tyilɛ n pɪ á tyí, té gbĩmegbĩ à n ne me nìvìnì sɔkɔ. Pě áɛ n tɔkɔ n pɪ yãm tãnne, té á mó tɔ́ me névye náhnáhɛ n pɪ tahbɪɛ. Pě áɛ n pɪ kwâh kěpúɛ, té yíyìn pól mó tɔ́ me á tyí.

<sup>11</sup> Korēnti tãn, gbɪ ye ápi n yo yé tyí. Á á fɔkɔ dal mɔ yéɛ. <sup>12</sup> Ápi náh á fɔkɔ kwĩnki yéɛ. Yépi ye yé fɔkɔ kwĩnki ápile. <sup>13</sup> Sú-á ríkẽne tyilɛ n yo n wẽnpì tyí sɔ́, sě ye mé me n yo tyilɛ yé tyí. Yé yĩne yè kè pĩ á tyí, yépi tɔ́ mó yé fɔkɔ dal n mɔ yĩ áɛ.

*Kyòó ànê fěntũ náh fě n kwɔ n mɔ*

<sup>14</sup> Yé káh ne n pɪ n soh Yesu yõ sě-ríkěpúɛ tir yó n̄tě sɔkɔ. Gbɪ wěkì kóló ànê tyítúkùnì pínó náh me wěkì núkú yõ. Kyòó ànê fěntũ náh fě n kwɔ n mɔ. <sup>15</sup> Krista ànê sètãn yõtě wró náh fě n kwɔ n mɔ. Yesu yõ sě-ò ànê Yesu yõ sě-ríkě névi wró náh fě n kwɔ n mɔ. <sup>16</sup> Fal fal tãn náh fě n kwɔ n mɔ Liyel ní-ńsah gbô sɔkɔ. Yé náh we di, ápile, Liyel ní-ńsah gbô ye áɛ à yĩne Liyel-á kè yo sɔ́ ne ríkě:

«Mé kɪ tẽ péɛ té kɪ me péɛ pé kó-n̄tãn sɔkɔ.

Mé kɪ pɪ pé Liyellɛ, té pè kɪ mó pɪ n̄ nolɛ.»

<sup>17</sup> Képah ye Tě ngbě Liyel ne: «Yé wil kéné névye wró, yè gbɛ n tẽ yé tyíɛ.

Yé káh n tũ kwâh yó n̄tě tyí nê náh me yályál n̄mɔ yah, képah sɔkɔ n̄mɔ kɪ mó yé tẽ plɛ.

18 Mé kɪ pɪ yé Súle, té yé kɪ mó pɪ ní dɪnpì ànê ní syónpìle.» Sě ye Tě ngbê yo, ñmɔ nê-á tãhkì nétêne.»

## 7

<sup>1</sup> N nénónó, Liyel vyãh kǎnó nópìle, ápi tɔ vyãh me sé sɔkɔ. Képah ye, tyi nónó pól-á silki sah á wil ànê á minne, á ye sè wu n tɔ á gblǒy sɔkɔ, à mó ne n me yályál Liyel yah ñ yah tíkí pínó sɔkɔ.

*Nìvìnì nê-á we Pole sɔkɔ Korēnti tăn-á pé gblǒy tiki mɔ*

<sup>2</sup> Yé ye á tyí nɔ yé tyí. Ápi náh pɪ de ñnî yó ntě tyí. Á náh ñnî yó ntě gbô tyɛ. Á náh syíkɪ ñnî yó ntě yô. <sup>3</sup> Yé káh we ne máh me sépìle n yo à lékàhle yéle n kǎ dé. Mé kè yo sah te yé tyí ne á min pól sɔkɔ, yé tyí-á me nónóle á tyí kũ ntě fyé náh fě á wró yíkɪ. <sup>4</sup> N sěnyĩnɔ me yé yô, ní nɪ me vínóle yéle. Yé tyí pɪ yĩ nɪ dénóle ní tyí. Yèkwɔrɪ duke pól sɛnsɔ me ále n we, ñte képah fyé yô, nìvìnì me kah mɔ ní sɔkɔ. <sup>5</sup> Áyáh fyò pɔ de Masedonɪ mara sɔkɔ, yèvyãhrɪ duke pól núkú syíkɪ á yô, á náh we mɪ yah kwéy ntěne. Mâl ye yey yey pólle, tíkí we á sɔkɔ. <sup>6</sup> Nte Liyel nê-á tɛnkwlɔpu nɪ dé-òle, à Tite tekɪ mɔ ápi kǎ á nɪ kǎ kè de. <sup>7</sup> Kè náh me ne Tite pónó ó sǎ ápi nɪ kǎ kè de, yáh sǒré nê mɔ ñ sɔkɔ képah tɔ ye. Tite pɔ yo á syah ní we dékè-á me yé kah tɛ sǎ, ànê yèkwɔrɪ nê-á me yé sɔkɔ, ànê yáh me yuku yĩn sǎ à ní vyãhle n syi. Képah wãn gbah mɔ ní nìvìnì yô.

<sup>8</sup> Máh sébéy nê tekı mo yé tyí, mé pĩ ne kãh yèkworı mo yé soko. Nte ké tékínmɔno náh pı nàhnpĩne ímo tyí. Té mäh pɔ kè kyɔmı we ne kãh yèkworı mo yé soko wró kwéy ó soko, kè pı nàhnpĩne í tyí. <sup>9</sup> Nte núkúnúkú, kè me nìvìnìne í tyí. Kãh yèkworı mo yé soko képah yĩn náh dé, yèkworı mē-á vɛnmɔno nê dahbı yé pı dükú soko, képah yĩn ye. Yé yèkworı mē sô me yínénóle Liyel tyí. Kãh mó pı sê, á náh pèkè yó ntê pı yé tyí. <sup>10</sup> Yé náh we di, yèkworı nê-á me yínénóle Liyel tyí, képah névi pı dükúle n vi n mo à ñne n mo pwáhnɔno wêkì yô, kè náh n pı nàhnpĩne tẽ tyí. Nte kèkôyô tyi sôno-á yèkworı nêne n mo névi soko, képah ye n pɔ n pɔ kũne. <sup>11</sup> Yèkworı nê-á me yínénóle Liyel tyí, kãh vɛnmɔno nê dahbı yé soko yé kè we yô:

Yé me yé gblöy kô yĩ.

Yé me gblöy yele n yah n kô.

Yé foko me vyãh yĩ yé gblöyne yĩ mē soko.

Tíkí me yé tẽ pèkè pínóle.

N we dékè me yé tẽ.

Yé me gbah tẽ yĩ Liyel wêkì kóló soko.

Yé me ké tyí ne fõhnó sah lékàh névi yô.

Yé kè wêkì dal mo ne yé vyãh náh me yĩ mē soko pólle. <sup>12</sup> Nmo náh sébéy mē wãrkı tekı mo tyítúkú pí-ò yĩnne, képah náh pı tyítúkú-á pı névi nê soko tẽ wo yĩnne dé, mé kè tekı mo ne yé kè pĩ Liyel yah soko ne ápi tyí-á me tah yĩ yé tyí.

<sup>13</sup> Yáh nê pı, képah ápi nno de kègbıle, té kè náh yĩn képah ó tyí dé, yáh Tite nı sũ ñ nı kô

kè vɪ sǒ, kè wǎn mɔ ápi nìvìnì yǒ. <sup>14</sup> Mé lésǒ nì gblǒy yǒ sah kwéy Tite tyí yé tyí sǒwǎh. Nte yé náh mó senné nì tǔ. Áyáh dar té gbùle n yo sǒ yé tyí, sǔ ye á yo yé yǐngbùle Tite tyí, té à mó ntyínɔ kyɪ kè wɛ sǔ. <sup>15</sup> Yáh à tǔ sah tǔ té yǒyen sah n yǒ sǒ, n dɔɔ mɛ n kwnɛ kéle, képah ye yé tyí gbah nɔ yǐ n tyí. <sup>16</sup> Kè mɛ nìvìnìne nì tyí, à tǔ wɛ nì gbò sah yé yǒ tyi tyi pól sɔkɔ.

## 8

### *Masedɔnɪ Yesu yǒ sǔpú tǐnkì-á pɔ mórí nê mɔ*

<sup>1</sup> N yǐnpyé, Liyel-á yǒbèndɔrɪ nê pɪ Masedɔnɪ Yesu yǒ sǔpú tǐnkínɔ tyí, á mɛ ké tyí ne á kè yo yé syah. <sup>2</sup> Yèkwɔrɪ duke náhnáh sǒ pè yǐni tǔ, nte képah fyé yǒ, nìvìnì sǒ mɛ kah mɔ pé sɔkɔ. Yǎm sǒ mɛ kah peke pé yǒ, nte képah fyé yǒ, pè pɪ yǐnkɔpu kègbùle. <sup>3</sup> Nmo ye pé tàrfyòle ne pǎh kè pɪ à syɪ pé gbò yǐn tyí, fók à kah mɔ pé gbò yǐn ntǔ yǒ à yǐne pé dɔɔ dɔɔ tǔne. <sup>4</sup> Té mɛ kè gbah yah kǔ ápi tyí ne á ye pé gbò dahbɪ á tyí yòhnìnmɔnɔ mè tékínmɔnɔ sɔkɔ Nsyude mara Yesu yǒ sǔpú tyí. <sup>5</sup> Ápi-á sǒ mɛ nêne n yah n kǔ, pè kè pɪ kah mɔ képah yǒ ntǔne. Pè pé gblǒyne Liyel nǐgbò kǔ, képah náh, té pé gblǒy dahbɪ ápi tɔ gbò sɔkɔ à yǐne Liye dɔɔ yǐ tǔne. <sup>6</sup> Képah ye, á mɛ Titi ni ne wǎh pɔ mórí syínɔ tò nê tyah yé tǐnne, à kè pɪ n dal n mɔ. <sup>7</sup> Sǔ-á yéle yahle tyi pól sɔkɔ yò: Liyel yǒ sǔnóle yé sɔkɔ, yé n wɛkɪ

n pne, yípîle yé soko, sóréle yé soko yĩn kēne, à tahlí névye tyínɔnɔ nê-á á dahmo yé soko, képah yĩnne á me ké tyí ne yé ne n me yahle pó mórí mónó mè to soko. <sup>8</sup> Kyĩnmɔnɔ náh mé n kyĩ n mo yéle máh képahle n yo dé. Nte máh no téló gbáhntɛnɔ tyíle n yo yé tyí, mé me ké tyí ne yépi to kè wěki ne tyínɔnɔ kègbi-á me yé soko. <sup>9</sup> Tě ngbê Yesu Krista-á pèpɔrɪ nê pɪ, yé kéle n pne. Yé náh we di, ñmo nê-á kwâh nétɛne, à fě syi ñ gblɔy pɪ yãm neyne sɔnko yépi pɪ kwâh nátãmne. <sup>10</sup> Nmo sɔnɔ-á nêne, yĩ mè tyí òinne, képah ye mé n yo yé tyí. Képah me yínénóle yépi tyí yépi nónó-á pɪ gbrole yán dùkùle à pó mórí mè mo, té kè náh yĩn képah ó tyí dé, ké pínó yáhntɔkɔnɔ wil yépi tyí. <sup>11</sup> Kãh pɪ sě, núkúnúkú yé tò mè pɪ n dal n mo. Yáh kè yah tɔko sɔnɔ pèpeyne sɔ, yé kè pɪ n dal n mo sě à yĩne yé gbò yĩnne. <sup>12</sup> Yé náh we di, wâh yĩ kɔ á gbò yĩnne à yĩne wáh kè yah tɔko sɔ, képah tyí nɔ Liyel tyí. Kwâh nê náh me á tyí, à náh képah níyne n tẽ. <sup>13</sup> Mé náh yo ne yé yé gblɔy mo yãm soko no téló tyí pɛki yĩnne dé. Nte mé me ké tyí ne yé kè pɪ yé pól ne n me núkùle. <sup>14</sup> Kwey mè soko, kwâh me yépi gbò. Képah ye, kwâh náh me nónó tyí, yé péle n yohnɪ n mo. Kwâh-à mó sɔ nêne me pépi tyí té kɪ n kne yépi tyí, pè kɪ yé yohnɪ mo. Kãh pɪ sě, yé pól kɪ me núkùle, <sup>15</sup> sɔ-á kéle wárkínsàhnóle Liyel wey sébéy soko ne: «Nê-á sɔ kwel dò, wãn náh wũ ñ tyí. Nê-á sɔ kwel kwéy, ñ tyí náh tɛkɪ.»\*

\* **8:15** 8.15 Yah n tɛ Yálnó 16.18.

### *Titi ànê n kómûne*

16 Liyel yĩn ne n gbilki, ñmɔ nê-á yé yòhnìnɔnɔ dékè dahbɪ Titi nɪ sɔkɔ, sɔ-á sɔ à kè dahbɪ ápi nɔ sɔkɔ. 17 Áyáh nê yah kɔ n tyí, à kè fẽ syi. Té yé yòhnìnɔnɔ dékè-á sɔ me n nɪ sɔkɔ sɛ, à núkú kè yah tɔkɔ n gblɔy rítɛne ne, páh kɪ yuku yé tĩnne. 18 Á me á yũpi yó tɔle n tɛkɪ n mɔ ñne wẽ tyí, nê-á Yesu yõ sɛpú tĩnkínó pól me n yĩngbɪle n yo Nìvìnì tir yónó tyí sɔkɔ. 19 Té à wil képah sɔkɔ, ñmɔ ye tɔ Yesu yõ sɛpú tĩnkínó yah wilki ne à ápi tɛkɪ mɔ á kyɪ pèpɔrɪ tò mè pɪ. Tẽ ñgbẽ yĩn gbilki yĩn ye ápi n pɪ tò mène à kéle n wẽkɪ tɔle ne tò mè pínó tyí-á me nɔ á tyí. 20 Á me tyi pólle n pɪ tɔle ne, pó ñgbẽ nê tyí-á dahbɪ á gbò, á ké tyi tɔ sah pɪ pɔ tye á káh yĩnyíkì we ké tyí sɔkɔ. 21 Á me ké tyí ne á ne n tɔ n sah n pɪ Tẽ ñgbẽ yah sɔkɔ, té kè náh yĩn képah ó tyí dé, á me ké tyí ne á ne n tɔ n sah n pɪ névye tɔ yah sɔkɔ. 22 Á ye á yũpi yó tɔle n tɛkɪ mɔ péle wẽ tyí. Á à we mɔ yah gbáhyí náhnáhlɛ, té sé pól sɔkɔ á kè we ne gbáhntɛ-ò-á ñne. Nte à tɔ me gbah tẽ kal núkúnúkú, wáh sɔnpɪle me sɛ yíi yépi yõ sɔkɔ. 23 Titi tẽ wɔle, ñmɔ kó-ò ye ñne, à me tɔle n pɪ ànê ñmɔle wẽ tyí yépi yĩnne. Nte á yũppyé téló wɔle, Yesu yõ sɛpú tĩnkínó ye tɛkɪ mɔ péle, Krista yĩn gbilki yĩnne. 24 Képah ye, yé kéle pè wẽkɪ ne pé tyí-á me nɔ yíi yé tyí, sɔnko Yesu yõ sɛpú tĩnkínó kè we, pè mó pĩ ne gbɪ-á me á tyí á yéle n sɔ.

## 9

*Yesu yǒ sěpú tǐnkì yòhnìnmonɔlɛ Yude mara sɔkɔ*

<sup>1</sup> Yòhnìnmonɔ nê-á kɪ n tɛkɪ n mɔ n pi Yude mara Yesu yǒ sěpú tyí, yǒ náh mɛ ké tyí mè sébéy tǒ yé tyí kɛpah tyí sɔkɔ. <sup>2</sup> Mé pǐ nɛ yáh mɛ ké tyí nɛ yé kè pɪ. Mé mɛ yéɛ n sǒ ntɛnɛ Masedonɪ mara Yesu yǒ sěpú tyí, mɛ n yo pé tyí nɛ, Akayi mara Yesu yǒ sěpú-á mɛ pé gblǒy vi tɛ yòhnìnmonɔ pɪ yǐnnɛ fǒó yán dùkùɛ. Kǎh pɪ sě, yépi nónó-á mɛ kénɛ mara sɔkɔ, yépi gbáhntɛnɔ mè sǒré mɔ névyɛ kan sɔkɔ. <sup>3</sup> Mé á yǔnpyéɛ n tɛkɪ n mɔ yé tyí, sǒnko mǎh mɛ yéɛ n sǒ sǒnó nɛnɛ yǐ mè tyí sɔkɔ, kè kǎh pɔ pɪ yǒ kɛnɛ. Ntɛ yè nɛ n mɛ yé gblǒy vi sah kègbɪ yǒ sǒ-á mé yo kéɛ. <sup>4</sup> Kǎh kɪ pɪ dùkù yóɛ, té Masedonɪ mara tǎn-à kɪ pónó yǐ nímɔɛ, té pɔ nɛ yah yé náh mɛ yé gblǒy vi sah, kè kɪ pɪ sen nǐgbɛnɛ ápi tyí áyáh sǒnpíɛ kǎh sě yé yǒ. Té yépi ntɛ wɔ tyí ye kè kɪ pɪ sennɛ. Ntɛ mé náh mɛ ké tyí nɛ mé kɛpah yo. <sup>5</sup> Kɛpah ye, mé kè sǒ nɛ mǎh yǐnɛ mé á yǔnpyé nópɪ ni pè mɔ nímɔ yahɛ, pè pɔ pó mórí mè tyí yahɛ n wah yáh yé vyǎh kǒ nê tyí sɔkɔ; sǒnko mǎh kɪ pópó n pi, ké tyí yah nɛ n mɛ wáhntɛnɔɛ, nê-á kɪ kè wɛkɪ nɛ yáh kè pɪ yé dyɔ dyɔ tɛnɛ, kýǐnmɔnɔ náh pè kyǐ mɔ yéɛ. <sup>6</sup> Yé se kè pǐ nɛ, névi nê-à duku mɔ kwéy, tɛ n pɔ sèmukɔ kwéy tɔkɔ; té nê-à duku mɔ dò, tɛ n pɔ sèmukɔ dò tɔkɔ té.

<sup>7</sup> Yé nénúkù núkú pól yǐnɛ yè kǒ à yǐnɛ yáh kè yah tɔkɔ sǒ yé nnɔ sɔkɔ. Nɛy kǎh kǒ à mó tǒ ké

nàhnpĩne n gbo, képah náh pĩ, pè sǒ tẽ kyĩ mɔ. Yé náh wɛ di, nê-á n yĩ n kǒ nìvìnì sɔkɔ, òmɔ tyí nɔ Liyel tyí. <sup>8</sup> Těnwɛnɔ mɛ Liyel tyí kɪ fě pèpɔrɪ duke pól pĩ yĩ yé tyí, sǒnko yĩ nónó pól yétô-á mɛ yé tyí, sè nɛ n mɛ yé tyí gbímegbí ànê dòhnò tɔlɛ, yé kǒ yè fě pèpɔrɪ duke pólle n pĩ, <sup>9</sup> sǒ-á kéle wárkínsàhnóle Liyel wɛy sébéy sɔkɔ nɛ:

«À ò nìle n dal n mɔ n yĩ n kǒ,

à n yĩ yām tãnnɛ n kǒ n yĩ.

ò fòkòpènrɪ tyí yĩn náh mɛ.»

<sup>10</sup> Liyel nê-á kwáhdúkúle sètòle n kǒ, té ò yǒ yǒ yòkele ònɛ n kǒ, òmɔ yɛ kɪ kwáhdúkúle yépi kǒ n pĩ, té kɪ kè kǒ kè kɪ kwel, kɪ wǎn mɔ yé fòkòpènrɪ pínó yǒ. <sup>11</sup> A kɪ yé pĩ kwáh nátāmne gbímegbí, sǒnko yè fě fòkòpènrɪle n pĩ tyé-ńkêne. Képah sɔkɔ, yáh yĩ nónónɛ ále n kǒ á névyɛle n kǒ n pɔ, pé náhnáh kɪ wɛkɪ Liyel tyí sépi yĩnnɛ.

<sup>12</sup> Yé náh wɛ di, yé pó mórí mɛ kɪ Yesu yǒ sǎpú yohnɪ mɔ. Té kè náh n yĩn n pĩ képah ó tyí dé, kè kɪ névyɛ náhnáh kǒ pè kɪ pèpɔrɪ pínó wɛyne Liyelle n kǒ. <sup>13</sup> Yǒre tò nê-á yé pĩ, pàh kɪ kè wɛ pè kɪ Liyel yĩn gbilki yáh sǒnpúle pĩ négbílé à fě syi tò pĩ Krista Nìvìnì tir yónó sɔkɔ. Pè kɪ tǒ Liyel yĩn gbilki yáh sǒnpúle yé gbǎn yíle pépi ànê nɔ téló pól tɔ yohnɪ mɔ. <sup>14</sup> Pè kɪ nírí pĩ yé tyí, kɪ pé tyínɔnɔle yé wɛkɪ yòbènrɪ ògbě mɛ yĩnnɛ, Liyel-á nê pĩ yé tyí. <sup>15</sup> Gbílkinó nɛ n sah Liyel yǒ ò pèpɔrɪ ògbě pínó yĩnnɛ, nê-á ké kénkǒ náh mɛ.

## 10

*Pole me lékàhle ò tyí yónyíkípule n kō*

<sup>1</sup> Nmo Polele, pè ne mǎh me yé tnô mè n ne n wekɪ dáb dáb, té mǎh gbɛ mo yéle mè n ne n wekɪ fyǒrì fyǒrì. Yesu Krista nǎpír pínó ànê ò nìgbèkì yīn yō, <sup>2</sup> nmo Pole kéle n yah n kō yé tyí ne, yé yé gblǒy ye, mǎh kɪ pɔ pɔ yé tnô, yé káh n kō mè pɔ ne n wekɪ fyǒrì fyǒrì yépi tɔ tyí, sǒ mé me kè sǒ sah pɪ pɪ tǎne névyɛ tyí nónó-á me n sǒ ne névi yòtǎhsyi pɪ dùkù-á ápi sɔkɔ. <sup>3</sup> Gbɪ ye névyɛ tǎ wɔ ye ále ó, òte áyáh mékì nê sɔkɔ yò, névi yòtǎhsyi tǎhkì náh á n fwo kéle. <sup>4</sup> Ápi-á mékìle n pɪ méfwóyì nónónɛ, névi gbɛnpɪnɔ náh séle, sè n wil Liyel tyí. Tǎhkì me sé sɔkɔ kɪ fɛ Liyel sépébi tyí ykɪ ànê sǒnɔ túkúnìne. <sup>5</sup> Kéne méfwóyì gbò yō, ápi me gblǒy gbílkipú tǎhkìle n ykɪ pépi nónó-á sǒ me káh-nsah tǔ névyɛ tyí ne pè káh Liyel pĩ. Á me névyɛ yòle n vi n mo pè kō pè n sah Krista tyí yō. <sup>6</sup> Yáh kɪ pɔ n sah palle Krista tyí yō gbí nêne, ápi náh tǔ nòhnì-nkê tir sah kè n sɔkɔ n pi fòhnó kǎne ké tyí sówāh. <sup>7</sup> Yé yí-á me tyi nónó yō, yě tyile n yah n tɔkɔ à yīne sépi óle. Nte nê-à me sɛ ké yō ne páh me Krista tyí yō, tǎ yīne à kè pĩ yīi tɔle ne sǒ-á péle Krista tyí yō, sɛ ó-á ápi tɔle ò tyí yō. <sup>8</sup> Tǎ nǎgbɛ tǎnwɛnɔle á kō ne á yé yohnɪ mo yé yuku yahle. A náh kéle á kō yé tyí ykɪ yīnne. Té nmo-à kɪ sǒ me n gblǒy yō sah kah mo kwéy képah tyí sówāh, kè náh me sennɛ nmo tyí. <sup>9</sup> Kè náh me á kɪ ne sébéy nópi sǒ mé n wǎrkɪ n tɛkɪ n mo yé tyí à

tíkile n mɔ yé sɔkɔ dé. <sup>10</sup> Yé náh wɛ di, túkù nɛ mäh mɛ fíí yéle té sébéynɛ n tɛkɪ n mɔ yé tyí mè n nɛ n nɔ n wɛkɪ fyɔ̀rì fyɔ̀rì ké sɔkɔ, té mäh pɔ yé tnô mè n pɪ tɛ́nkwɔ̀-òlɛ, wɛ́nfɪ ó-á mè n nɛ n wɛkɪ. <sup>11</sup> Névi nê-á n yo képahle, tɛ́ yĩnɛ à kè pĩ nɛ sɔ́-á ápi wɛkɪ tɛkɪ mɔ á sébéynó sɔkɔ, áyâh pɔ yé tĩnnɛ sɛ́-á á kɪ n wɛkɪ.

<sup>12</sup> Névyɛ nónó-á mɛ pé gblɔ́y yígbíle n yo, ápi náh á nɪlɛ n syâh à á gblɔ́ynɛ n sâh pépile. Lékám kɛ́ névyɛ yɛ péle, nónó-á pé gblɔ́y tokɔ pɪ sâh sâh dúle à wɛ́nɛ n sâh kéle. <sup>13</sup> Yĩn-ńsah nê-á mɛ ápi tyí, ápi tɛ́ wɔ́ náh á gblɔ́y gbilki n kah n mɔ n pi képah yô. Tò nê-á Liyel dahbɪ á gbò, nê gbò yô-á á yĩni tɛ́ yé tĩnnɛ, ápi kɪ á gblɔ́ynɛ n gbilki à yĩnɛ képahle. <sup>14</sup> Á náh n kah n mɔ n pi képah yô, á kɪ nɛ á kósyĩ pɔ yé tĩnnɛ. Ápi ñgbò yɛ pɔ yé tĩnnɛ à pɔ Yesu Krista Nìvìnì tir yo yé tyí. <sup>15</sup> Á náh n kah n mɔ n pi képah yô, kɪ pɔ á gblɔ́ynɛ gbilki no téló tò pínó yĩnnɛ. Ntɛ á mɛ ké tyí nɛ yé yuku yahle Yesu yô sɛ́nó sɔkɔ, sɔ́nko wǎn mɔ á tò yô yé tĩnnɛ à yĩnɛ yĩn-ńsáh nê-á á kɔ́. <sup>16</sup> Képah náh, á kɪ fɛ́ Nìvìnì tirlɛ n yo n kɔ́ tǎntǎn téló sɔkɔ nónó-á sé gblɔ́y yépi tĩnnɛ. Á náh ñnî yó rítɛ́ tò pínó tokɔ á gblɔ́y gbilki n pi. <sup>17</sup> Kè mɛ wǎrkínsàhnóle Liyel wɛy sébéy sɔkɔ nɛ: «Névi nê-à mɛ ké tyí nɛ pé pé gblɔ́y gbilki, Tɛ́ ñgbɛ́-á tyi nónó pɪ ápi tyí, tɛ́ ñ gblɔ́y gbilki sépi yĩnnɛ.»\* <sup>18</sup> Névi nê-à ñ gblɔ́ynɛ n sɔ́, kè náh pɪ á kɪ nɛ ñmɔ sɔ́ négbíle

\* **10:17** 10.17 Yah n tɛ́ Nsyɛrɛmɪ 9.23 ; 1 Korēnti tăn 1.31.

dé, Tě ñgbě-à névi nêne n sô, ñmɔ ye négbíle.

## 11

*Pole ànê névyé nónó-á pé gblǒyne n pɪ Yesu tẽntò névyele*

<sup>1</sup> Yé náh wɛ di, mé mɛ ké tyí nɛ yé n vɪ tyi sómnó pɪ yah sě kwéy. Ùú, yé n sómnó pɪ. <sup>2</sup> Mé mɛ yé gbĩ mɔ sah pɛ núkú ó tyí, nê-á pɪ Kristale, kɪ pɔ yéle à kô n pɪ dí tyí pí-ńkê sɛnpir sô nê-á mɛ yályál Liyel yah. Képah ye, yé tyí mɛ n nɪle n yɔrɪ sô-á kè Liyel nɪle n yɔrɪ. <sup>3</sup> Ntɛ tíkí mɛ n tẽ nɛ yé sônɔ káh pɔ vi mɔ, kè pɔ yé wró kwrónmɔnɔ pèpɛy mɛ gbekɪ ànê Kristale, sô-á wahy Awa vi tẽ lékámkâm sɔkɔ. <sup>4</sup> Yé náh wɛ di, névi yó-à pɔ Yesu káhkí yó tyíle n yo yé tyí, nê-á mɛ ñ gblǒy áyáh nê tyí yo yé tyí, yě kè fẽ n syi. Névi yó-à pɔ mírki káhkí yó tyíle n yo yé tyí, nê-á ké gblǒy Liyel Mirkile yáh nê tyí noh ápi tyí, yě kè fẽ n syi. Névi yó-à pɔ ñìvìnì tir káhkí yó tyíle n yo yé tyí, nê-á ké gblǒy Ñìvìnì tirlɛ yáh nê tyí noh ápi tyí, yě kè fẽ n syi. <sup>5</sup> Ntɛ nónó-á Yesu tẽntò névyé ñgbnɔle yé tyí yé yo, ñmɔ náh mó tǔ mɛ fí yó wɛ, ñyāh-á pè fónfó ñmɔ yô. <sup>6</sup> Máh kɪ sô mɛ wey yah wé-ńkêne, pnèno tẽ wɔ mɛ n tyí à yuku Liyel tyí tinnɛ. Á ye képah dùkùle yé wẽkɪ dal mɔ tyi tyi pól sɔkɔ. <sup>7</sup> Máh Liyel Ñìvìnì tir yo yé tyí nònóle, té n gblǒy tiki mɔ yé yô yô yinne, tyípekè se pyě mé pɪ képahle? <sup>8</sup> Yesu yô sěpú tinnkínó yísyó ye yin ñmɔ yinnóle n kô mé tẽ wɛ pɔ tò pɪ yépi wró à yé yohnɪ mɔ. <sup>9</sup> Máh lésô mɛ yé tinnɛ gbí nêne,

yî tókù yétô lésô me ní tẽ, ñte mé náh sè syi ñnî yó ntẽ tyí. Á yúnpyé nónó-á wil Masedoní mara sòkò, pépi sò me ní yétô yî pólle ñne n kò képah ye. Tyi pól sòkò, mé náh sò me ké tyí ne mé pì yótókóbíle ñnî yó ntẽ tyí, té mé kì tǒ gbah n tẽ n pì sě. <sup>10</sup> Gbì yó-ò ye ñne Krista gbò yò: ñnî yó ntẽ náh fě yò yónó mè wénó yah kò n pì ní tyí Akayi mara pól sòkò. <sup>11</sup> Kwáh nê pì té mé képahle n yo? Yé tyí náh me nò ní tyí képah se? Liyel ntẽ pĩ ne yé tyí-á nò ní tyí dò. <sup>12</sup> Máh me nêne n pì yò, mé kì yò n sòkò n pì ké pínóle, kì névyè kùrn kah nónó-á me syǒ-ñsahle n yah n kò kì pé gblǒy gbilki, ne páh pì nùkùle ápile. <sup>13</sup> Kéne névyè nópìle, nósýó ye nónó-á me pé gblǒyne n pì Yesu tẽntò névyèle. Pè n ne n vi n syíkì névyè yò, n té pé gblǒyne n pì Yesu Krista tẽntò névyèle. <sup>14</sup> Nte képah náh me gbëndùnñe dò. Yé náh wè di, sétàn yõtẽ ntẽ tò n gblǒyne n viri n pì yínyò tǒnpìle, nê-á me kyòò dò. <sup>15</sup> Képah ye n tǒnpìbì tǒ-à pé gblǒyne n pì gbì Liyel tǒnpìbìle, kè náh me gbëndùnñe. Pè kì pé tǒ pínó lédýáhní wè n pì ké tyé-ñsah sòkò à yĩne pé tyípínè.

*Pole-á yèvyǎhrì nónó pì Liyel tǒ sòkò*

<sup>16</sup> Mé kì n syì kè tǒ yo yé tyí ne, ñnî yó ntẽ káh ñmòle n yah vǐnpìle. Nte yáh kì se me n sǒ sě, yé ní tẽ vǐnpì tyí kǒle, ní tǒ mó ní gblǒy wè n gbilki kwéy kè. <sup>17</sup> Nte máh kì nê yo n pì, mé náh me kéle n yo Tẽ ñgbě-á me ké tyí sǒ dé, mé me kéle n yo vǐnpì tyí kǒle sǒnko mè ní gblǒy wè n

gbilki. <sup>18</sup> Névyé náhnáh-á fyò me pé gblǒyne n gbilki kèkōyó dékè tyi yinne, nmo to kɪ n gblǒy gbilki. <sup>19</sup> Yépi nónó-á lékám névyele, kè yé dyo yé fě syi à vɪnpɪ sómnoʎe n pɪ. <sup>20</sup> Yè n fě n syi pè kɔ pè yéle n pɪ yɔbɪ tyí kɔle, n té ne n sykɪ yé yɔ, n té yéle n yí, n té yéle n yilo, n té yé létáhlóle n kɔli. <sup>21</sup> Máh nêne n yo yò, kè me senne yé tyí. Kè ye á tɛnkwlono wɛkɪ.

Nte képah fyé yò, nnî-à kɪ fě syi n gblǒy gbilki n pi tir yó tyí soko, nmo to kɪ fě sɛntɛ pɪ, máh kɪ sɔ me n wɛkɪ vɪnpɪ tyí kɔle. <sup>22</sup> Pépi-à kɪ se me Yebrenine, Yebreke ye nmo tole. Pàh kɪ se me Yisrayel nole, Yisrayel ney ye nmo tole. Pàh kɪ se me Abrahamɪ náh tǎnne, n náh ney ye nmo tole. <sup>23</sup> Pàh kɪ se me Krista tɔnpɪbɪle ò, mé kɪ tɔ kè yo á kɪ ne vɪnpɪ sɔ nne. Nmo tɔ pɪ kal pé pólle, té yèvyǎhrɪ pɪ kal pé pólle, té de wòkònpèkè soko à kal pé pólle, té ko syi kal pé pólle, té kũ dlo gbal gbáhyí náhnáhle à kal pé pólle. <sup>24</sup> Nsyifuno n ko yèfòh yí yògbám pò kwǎryǎhle, fók gbáhyí kwlo. <sup>25</sup> Wrome tǎn n ko yèfòhle gbáhyí tɔnó.

Névyé n minki dyèhle ke núkúle.

Krótókè tiki de yah nne yo soko ke tɔnó,

ànê yo n yò farkɪ yah gbɪyíkɪ núkú ànê lékǎh núkú wró soko.

<sup>26</sup> N kóló náhnáh soko,

mé dlo gbal yrey yúkúnó kǎh-nɛtǎn soko,

té de wil névyé yò vɪnsyɪkɪpu dlonɔ soko.

Mé sò me dlo soko n yíkɪ névyé Nsyifuno wró soko,

té me dlo soko nékáhbí wró.  
 Mé sò me dlo soko kwil nɔyó,  
 té me dlo soko gběnni soko.  
 Mé sò me dlo soko pne yó soko,  
 té me dlo soko ní yúnpyé mìnnyobe wró.

<sup>27</sup> Mé tãnkýèh náhnáh pɪ à yèvyãhrɪ pɪ soko.  
 Mé yah sò lékãhlò náhnáhlɛ, té kwɛkɪ ànê níkĩ  
 sómnó pɪ. Yòke yah kwlo yah ní tyí gbáhyí  
 náhnáhlɛ, mé tẽ kwɛkɪ soko. Mé tẽ yah vɪrɪ soko,  
 té tẽ yah flo kěne ní tyí. <sup>28</sup> Nte nê ntẽ tyí-á me tah  
 yíí ní tyí, ní vyãh náh syɪ képah tyí dé: Képah  
 nê-á pɪ fókósõnò nê-á me ní soko à yuku Yesu yó  
 sɛpú tĩnkínó tyí tĩnnɛ. <sup>29</sup> Nnĩ-à me tẽnkwlòno  
 soko, nĩmò to n pɪ tẽ tyí kòlɛ tẽnkwlò-òlɛ. Nnĩ-  
 à tyípékè pɪ, kě nĩmòlɛ n yó. <sup>30</sup> Máh kɪ sò me  
 yĩnɛ mè ní gblɔy gbilki, mé kɪ ní gblɔynɛ n gbilki  
 ní tẽnkwlòno tyí soko. <sup>31</sup> Liyel nê-á Tẽ n̄gbɛ Yesu  
 Súle, nĩmò pĩ nɛ mìnì náh mé n yó. Sãm nɛ me  
 mónólɛ n soko gbĩmegbí. <sup>32</sup> Máh sò me Damasi  
 kwil soko gbí n̄nɛ, yòtẽ dí Aretasi-á kwiltẽ nê  
 wilki sah n̄énpó, nĩmò sò me pè kò pè kwil dé-  
 ntãnnɛ n syɪkɪ nĩmò tẽ yĩnnɛ. <sup>33</sup> Nte pè me ní dah  
 mò gbétó yó soko à wilki mò sètír pwàhlɛ à tiki  
 mò kwil kěnkahnɛ ní kò mé wɛ pwah n̄ gbò.

## 12

<sup>1</sup> Nĩmò se yĩnɛ mè ní gblɔynɛ n gbilki? Yó kě ye  
 képahle. Nte képah fyé yó, máh wěkínó nê wɛ,  
 té pn̄énó nê wɛ wil Tẽ n̄gbɛ tyí, mé kɪ sépi tyí yó.

<sup>2</sup> Mé Krista yó sɛ-ò yóle n pne, ké ye gbõnyáh ye

yò, — à yõ doko soko yĩnyõ léyy tẽ-nsah soko. Ténkàh à yõ doko soko ò wil gběnsê tɔlɛ nɪ? Ténkàh wěkínó ye à wɛ nɪ? Nmo tẽ wɔ náh pĩ. Liyel ó ye n pne kéle. — <sup>3-4</sup> Gbɪ ye, mé pĩ ne dí mè-á yõ doko yuku fók yĩnyõ pal tẽ-nsah. Ténkàh à yõ doko soko ò wil gběnsê tɔlɛ nɪ? Ténkàh wěkínó ye à wɛ nɪ? Nmo tẽ wɔ náh pĩ. Liyel ó ye n pne kéle. Té à me wɛlɔ yísyó noh nónó-á sè náh fẽ n yo, ké wěkì náh me névi tyí kɪ fẽ n syí sé yõ. <sup>5</sup> Nmo kɪ fẽ n gblɔy gbilki sɛnkɔ névi tyí soko. Nte mé náh n gblɔy gbilki n pi n tir yó ntẽ yinne né n tɛnkwlɔ-ntàn ó yĩn náh. <sup>6</sup> Mâh sɔ sò me ne mé n gblɔy gbilki, mé náh n mo n kò n pi vɪnpɪlɛ. Yé náh wɛ di, gbɪ ye mé náhkɪ n yo. Nte mé me n gblɔyne n tẽ képah pínóle, sɔnko yáh nê wɛ té nê noh n tyí, ònɪ yó ntẽ káh pɔ n sɔ kah mo sépi yõ, <sup>7</sup> ànê mé káh n pɔ n gblɔyne n gbilki wěkínó mè wénó yinne nê-á pɪ gbille. Fókhnó yó me sah nmo wil gběnsê yõ, á kɪ ne sétàn yòtẽ sɔ tɛkɪ mo ò yĩnyõ tɔnpɪ yóle ne à pɔ n yah kò mé káh n pɔ n gblɔyne n gbilki. <sup>8</sup> Mé Tẽ ngbẽ ni ke tɔnó ne, à fókhnó mè wró gbɛ mo nne. <sup>9</sup> Nte à me yo n tyí ne: «Nmo-á pèpɔrɪ nê pɪ á tyí, képah kɪ yĩne ále. A tɛnkwlɔnɔ soko ye nmo n wěkɪ n yĩ n tãhkìle.» Képah ye, nmo me ké tyí ne mé n gblɔyne n gbilki n tɛnkwlɔnɔ wɔ soko, sɔnko Krista tãhkì ne n me n soko. <sup>10</sup> Képah ye, Krista yinne mâh me tɛnkwlɔnɔ soko, képah náh pɪ pàh nne n gbyɔ, képah náh pɪ mâh me kwlónó soko, képah náh pɪ pàh nne n fõh, képah náh pɪ tiki

képékè-à με ní sòkò, mè n ne n me nìvìnì sòkò. N tēnkwlòno gbí ye tǎhkì n we ní sòkò.

*Pole yáh-ńsah me tye Korēnti tãn Yesu yõ sěpú tyíle*

<sup>11</sup> Mé we pì lékám kě névi sǒ ńne. Té képah wil yépi tyí. Yépi ye sǒ yĩne ńmò yíngbí yónóle. Yé náh we di, mǎh kì sǒ me tir yóle n pékí-ńkěne, nónó-á yé n ye Yesu tēntò névye ñgbnóle, pè náh fǒnfǒ ńmò yǒ. <sup>12</sup> Gbì yǒ, mé sǒmnó pì yé tĩnne à gběndùni tyi pì, ànê gbìl tyi duke náhnáhlè, ànê tyítǎhnìne, nónó-á n wěkì ne Yesu tēntò névi-á ńne. <sup>13</sup> Mé se Yesu yǒ sěpú tĩnkínó téló tǎkò fǒnfǒ pì yéle tir yó sòkò? Mǎh yahle ne yé káh yĩn ní yínnóle képah ó náh di? Yé képah yǒ mò ní kǒ, mé náh pì ple yé tyí. Yesu yǒ sěpú tĩnkínó téló fǒnfǒ yé yǒ tir nê sòkò? <sup>14</sup> Yé yah, ńmò me ní gblǒy vi te gbáhyí tǒ-ò pónó yĩnne yé tĩnne, té yé náh n yĩn n pì ní yínnóle. Yé náh we di, yépi ye mé n yah n kǒ, yé gbǎn yĩ náh. Wěnpì náh yĩne pè gbǎn yĩle n yah n sah pé dúbípu tyí. Dúbípu ye yĩne pè ne n yah n sah pé wěnpì tyí. <sup>15</sup> Nmò kì fě syi kì ní gbǎn yĩ ànê ní min tǒ kǒ yépi yĩnne. Yé tyí-á sǒnpìle kah nò ní tyí, képah se kì kwâh wilki ńmò tyínòno sòkò yé tyí? <sup>16</sup> Gbì ye ñnî yó ntě náh yĩn ní yínnóle. Nte yé tókù me n yo ne lékámkám névi-á ńne, mǎh yéle n yǒ yínvî sòkò. <sup>17</sup> Mǎh nónó tǒ tekì mò yé tyí, mé se syǒ pépi tyí à yé yǒ? <sup>18</sup> Mé Tite gbah tē ne à kyì yé tĩnne.

Mé á yǔnpi yó to tekı mo ñne nê tyí-á lésõ mé yo yé tyí. Tite se me po yéle n yõ? Nmo sɔno ànê ñmo tyí náh pı núkúle di? A ko dukù to náh pı núkúle di? <sup>19</sup> Yé me n sɔ di mónóle ne ápi-á me gbule á gblɔyne n kɔ yépi yah soko. Nte sɛ náh dé, tyi nóno-á á n yo, Liyel yah soko ye á n yo séle á wró kwrónmɔno gbɔ yõ Kristale. N nénónó, ápi me sé pólle n yo yépi Liyel yõ sɛnó yah yuku yinne. <sup>20</sup> Tíkí me ní tɛ ne máh kɔ po yé ñne mé káh n po yé we máh me n sɔ sɔ, yépi to káh ñmo we yáh me n sɔ sɔ. Tíkí tɔ me ní tɛ ne mé káh n po mál we yé wró, ànê yúnwɔrí pínóle, ànê fòkɔnvyàhnì pínóle, ànê wɛ fwónóle, ànê wɛ tyí yónkònóle, ànê yín yìkì pínóle, ànê gblɔy gbílkinóle ànê tyífɛ pínóle. <sup>21</sup> Tíkí tɔ me ní tɛ ne máh kɔ po yé ñne, ní Liyel káh n po ní yilo yé wró soko, ànê mé káh n po n gbo névyé yinne, nóno-á lésõ tyípékè pı ñgbòle, té pè náh me yal mo pɔpɔ pínóle, ànê pròprò pínóle, ànê sèn pí-ńkɛ tyi pínóle.

## 13

*Pole-á vɛnmɔno téy ànê wey ñne Korēnti tăn kɔ*

<sup>1</sup> N gbáhyí tɔ-ò ye n pi yé ñne. Tyi pól kɔ n wah à yíne tàrfyò népì ními, képah náh pı tɔmí vyàh weyne. <sup>2</sup> N pónyahno ke ní-ò soko, mé lésõ gbáhdýàh di névyé tyí nóno-á sɔ tyípèl pı soko ñgbòle ànê no téló to tyí. Té kweyne mé náh me yé wró, nte mé tɔ ké gbáhdýàhle n tɔ n di yé tyí

ne, mäh nı syı pɔ, mé náh tɔ nñî yó ntẽ yãm yah n pi. <sup>3</sup> Yé me ké tyí ne yé kè pĩ Krista-à kɪ me n syô nmo tyí à n yo n mo yé tyí. Těnkwlɔ-ò náh ñne yé tyí. A kɪ ñ tẽnwenɔ wěkɪ yé wró sɔkɔ. <sup>4</sup> Gbɪ tẽ wɔ ye, ñ tẽnklwɔnɔ sɔkɔ ye à syı dahnı yô. Nte à me min sɔkɔ Liyel tẽnwenɔ gbô yô. Api wró kwrónmɔnɔ gbô yô ñne, á tɔ me tẽnklwɔnɔ sɔkɔ. Nte Liyel tẽnwenɔ gbô yô, á me min sɔkɔ ñne. <sup>5</sup> Yé yé gblɔy sohlı n yah yé pĩ yáh kɪ me yé minne n pı Liyel yô sěno sɔkɔ. Yé kɪ kè we pĩ ne Krista-á me yéle. Gbɪ náh di? Kàh mó pí-nkẽne sě, gblɔy sóhlínyahnɔ mē náh sɔkɔ ké wěkɪ yô yé tyí. <sup>6</sup> Nte nmo sěno me ké yô ne, yáh kɪ kè we pĩ ne Liyel yô sěno-á me á sɔkɔ. <sup>7</sup> Á me Liyelle n ni yé tyí sɔnko yé káh tyípékèle n pı. Á náh me ké tyí ne á kèle n wěkɪ ne tẽnwenɔ-á me á tyí, ñte á me ké tyí ne yé tyípéplɔ óle n pı, ápi-á sɔ me tẽ klwɔ. <sup>8</sup> Yé náh we di, gbɪ fwo fwo tãhkɪ náh me á sɔkɔ. Gbɪ tyí ye á me n so n mo. <sup>9</sup> Api-à me tẽ kwɔ gbı nêne, té yépi me tẽ we, ké ne me nìvìnìne ápi tyí. Áyáh me nêne n ni Liyel tyí képah ye ne, yé Liyel yô sěno ne n yuku yahle. <sup>10</sup> Képah ye n kɔ mé sébéy mēne n tekı n mo yé tyí té nı sah fíı yéle, sɔnko mäh kɪ pɔ pɔ yé tinnē, Tě ñgbě tẽnwenɔ nēne nı kɔ, mé káh n pɔ képah tɔkɔ n peke yé yô. Yé náh we di, à kèle nı kɔ ne mé yé yohnı mo yé Liyel yô sěno kɔ kè ne n yuku yahle. A náh kèle nı kɔ yé tyí yıkı yinnē. <sup>11</sup> Ké tyé-nsah sɔkɔ nı yúnpyé, yé tẽ nìvìnì sɔkɔ, yé mó gbah n tẽ n pı wényo-nsah kēne ye

tyí. Yé sǒréle n mɔ wě sɔkɔ, yè mó nɛ n sah wě tyí yǒ. Yé yé minne n pɪ yèvinɪ sɔkɔ, képah sɔkɔ tyínɔnɔ ànê yèvinɪ Liyel kɪ mɛ yéle. <sup>12</sup> Yé wɛkɪ wě tyí tyínɔnɔ wɛy pèpɛynɛ. Yesu yǒ sěpú pól n wɛkɪ yé tyí. <sup>13</sup> Mé kéle n yah n kǎ Tě ògbě Yesu Krista tyí nɛ, à yǒbènɔrɪ pɪ yé tyí, Liyel mó tyínɔnɔ dahbɪ yé sɔkɔ, ò Mirki mó yé wró kwɔ n mɔ.

**wĩn nìvìnì tirlɛ**  
**toussian du sud: wĩn nìvìnì tirlɛ New Testament**  
**Nouveau Testament en toussian**

copyright © 2013 Wycliffe Bible Translators, Inc.

Language: Toussian, Southern

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 22 Feb 2024 from source  
files dated 29 Jan 2022

aaf2875e-90b5-5c14-b910-61579d3da2c7